



Siverth K. Heilmann

UKA 2022/29-1

Atassut

16. November 2022

Kalaallit Nunaanni illunut inissianullu Radon-ip qinngorneranut illersuutilersuinissamut periarfissanik misissuititsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup imarissavaa pisortat ingerlataanni illuni aamma nammineq illuni inissianilu pisortanit pigineqartuni arlalinni periarfissarsiornissaq. Kingusinnerpaamik 2023-mi ukiaanerani ataatsimiinnermi misissuinermit innersuussutit saqqummiunneqassapput.

(Inatsisartunut ilaasortaq, Mariane Paviasen, Inuit Ataqatigiit)

Siullermik inatsisartuni ilaasortaq Mariane Paviasen, Inuit Ataqatigiit, qulaani qulequtarineqartumut pissanganartumullu siunnersuuteqarninnut qujanaq, imatullu Atassummiit oqaaseqarfigissavarput.

Qangaaniilli aatsitassarsiorfiit Nunatsinni soqutiginnillutik paaasinnaanissaminnillu siunertaqarlutik pisortanut saaffiginnittoqaraangat piumasaqaataavoq, avatangiisinut, pinngortitamut, inunnullu sunniutigisinnaasaat minnerpaaffissamiitneqarnissaat kiisalu ajutoortoqassagaluarpat pinngitsooratik saliginissamut aningaasaliisimanissap minnerpaamik qularnaareerneqarnissaa.

Nunatsinni annertunerpaamik Narsami radoneqarnera, annikitsumillu Qaqortumi Nuummilu peqarfeqarnera ilaatigut 2013-imili nalunaarsugaaneri ilisimavarput. Aatsitassaq pinngoqqaatiminik siammariartortarnera nalunaarusiani nassuiaasoqartarneranilu paasisimavarput, taamaattumilluuna Narsap illoqarfianut ilaatigut Radon siammarternikuusooq, pisortat sanaartortissimasaannut innuttaasullu namminerisamik illuisa toqqaviinut innarliiginnarani aammali peqqissutsimut sunniuteqartartoq.

Naalakkersuisutut atuunnerma nalaani allamik Naalakkersuisoqatinnik peqateqarlunga, Narsap atuarfiata toqqaviani annertuumik qulluulersimammat kommune paaseqatigilluinnarlugu isatertisimavarput, nutaamillu atuarfiliortitsineq qangaaniilli piviusunngortissimasatta ilagiinnarpaat.

Taanaatumik siunnersuuteqartup tunngavilersornermini illut amerlasuut Radon-imut illersuuserneqarsimannginnerinik oqarnera assortugassaangilaq aammalu paasisitsiniaasoqaqqittariaqarnerisooq ilanngullugu nalilersorneqartariaqartutut Atassummiit ammaffigaarput.

Naggataagut oqaatigiinnarusuppara, Narsaq uran-eqarfissuunera pillugu, qulaanilu siammarterlutik sunniutigisagaasa kingunerisaanik ilisimasalinnik oqariartorfigineqarnera puujunngisaannarakku tassaasoq, qinngorneq ulorianartoq peerneqartariaqartoq, peqqissutsimut ulorianartorsiorfitsinera annertusiartuinnassanngippat.

Taamaattumik Atassummiit kaammattuutigiinnassavarput, suliap aappassaaneerreqartigani ataatsi-
miititaliamut susasaqartumut sukumiisumik nalilersuinerit ingerlanneqaqqaarniarallalik. Ataatsi-
miititaliarlu sulilluarnissaannik kissaapparput.

Qujanaq.